

紫阳县志

一
函
五
册
函

紫陽縣志卷六

邑令吳

純纂修

典史施鳴鑾

訓導張

濂

校閱

人物志

人材之盛不限一途操藻鑑者如必名流碩彥勲業彪炳之人而後紀之固足以表山川之間氣然十室之邑必有忠信彼愚夫愚婦行脩一鄉立節千古者安見不可與天地爭不朽耶紫陽前志之脩越今百七十餘年其間懿行高誼已多湮沒無稽設不及時搜採大爲表彰不特無以發潛德之幽光將後有作者亦何從挹清芬而仰渠蘄乎爰參合舊志分

宦業懿行孝友忠勇義捐節烈仙釋七門陰行有愧雖貴不傳至德可嘉雖微必錄謹依類書之以彰邑中之靈傑焉作人物志

宦業

纂經陽志

魏學會字惟實號確庵原籍涇陽嘉靖癸丑進士授戶部主事歷員外郎郎中有權璫欲爲商人冒支芻餉鉅萬大司農許之學會執弗與督餉宣府適敵騎薄城守者不知所出學會遽攝戎衣乘城指授方畧敵遁去擢光祿寺少卿尋拜都察院右僉都御史巡撫遼東遼有叛卒黃勇者踪迹詭秘朝廷懸重賞購之不能得學會故不問或以爲言則曰勇本吾

人向處置失宜故外通耳我且撫而用之何購爲勇聞以爲
信然偕數卒入城乃執之甕城中因晉俸兩級無何晉右副
都御史巡撫如故尋以疾告起爲兵部右侍郎改吏部轉左
時新鄭高公以閣臣攝部事閣務繁劇部事一切倚重之學
曾厯年格杜請謁每事皆稱善神宗卽位江陵新鄭不協新
鄭策免廷臣失色公獨大言曰上踐祚甫數日首逐一顧命
大臣草詔出何人手不可不明示百官衆爲凜然以此失江
陵歡方晉南都察院右都御史隨有列白簡者詔褫新命以
侍郎歸江陵敗乃起爲戶部侍郎未任改右都御史督倉場
尋陞南戶部尙書再疏乞骸骨謝政會敵擾西北有詔簡大

帥廷議以學會名上起兵部尙書兼都察院右副都御史總督陝西三邊軍務學會抵固原敵擁衆數萬奄至三戰三北俘馘不可勝計上嘉其勛晉太子少保蔭一子世襲錦衣千戶賜金綺有加邊事方以次舉而寧夏唃拜父子殺撫道據城以叛學會謂賊已負隅顯言攻之彼守益堅恐未可旦夕取也乃發檄僞撫以緩之潛檄各鎮徵兵餉自統大軍駐靈州以偏師駐花馬鳴沙諸要害使不得渡河窺關又分兵收服四十七城堡以孤賊勢兵餉四集則進師薄城下圍之賊梟將唃雲中箭死賊氣以奪而城堅不可拔計惟決水可灌灌城恐傷士民且促之從賊不便乃築堤障水圍城將圯城

中懼且譟學會曰此可以行間矣乃射書城中疑之使自相
圖居民亦多受計爲內應未幾噶氏果與其黨自相殺門啟
師入噶氏闔室自焚死寧夏以平先是言官急欲攻城有議
學會逗遛詔逮問學會旣行而城破縉紳上書白冤章滿公
車學會終不一言自明而上感悟還學會官歸里居父母喪
先後六載不酒肉不足涉中門周恤鄉鄰不稍吝而自處甚
約所學以誠信不欺爲主後移歸原籍卒諡恭襄祀鄉賢
劉四科字健菴原籍涇陽隆慶辛未進士授長治縣知縣晉
俗以丁坐役多欺售四科廉其奸狀貧富稱平陞吏部主事
尋陞考功郎時尙綜覈四科曰彈文多溢語吾寧從寬令其

改過時至政府有循次當陞吏科都給事者以其人曾爲政
府幕置之冢宰缺政府注意有人科正色曰某優於館閣知
人非其任也竟不從轉太常卿養病家居起太僕卿或言牧
馬地稅可歲得二萬金四科三具疏止之璫黨以抗拒忤上
卒從科議晉都察院右副都御史撫薊鎮時畿輔水災請上
發帑金數萬賑濟者滿晉兵部尙書巡撫如故卒於官贈太
子少保賜諭祭葬入鄉賢子宇曜萬厯庚戌進士

按魏劉二公登仕後改歸原籍故涇陽縣志亦載之然紫
邑皆僑戶占籍土著百無一二迄今曰猶然且性敦柔梓
里十世以後猶自稱其舊貫或歸原籍此正足徵風俗之

厚故紫陽人物雖似借材外邑實與土著無異也

劉其德字子尙崇禎戊辰進士選翰林院庶吉士陞檢討博學好古雖盛暑祈寒手不釋卷每召對多稱旨後寄居襄陽府城陷死之

按興安州志謂厯官諭德通志謂其德歸守興安而死與紫陽舊志互異

懿行

楊廣宗監生字萃青太湖縣人孝廉家坤父也少家貧以菽水棄儒業內行敦篤慷慨尙義購祀田修族譜推產分財於手足宗黨間恩誼倍摯平居恂恂無過言惟務以德讓化其

鄉人托孤告急一諾終不負平生行誼之美類如此享年八十二歲以無疾終

鄒景桂邑廩生家貧授徒郡城人敬憚之衣冠不正不敢令先生見安邑馬明府見其文許爲名士屢欲造廬求見然卒抱周豐之節而未允所請也與同志則飲酒論文終日不倦並出硯田所積濟其匱乏精岐黃術惟務濟人嘗曰平生無善可陳得爲良醫足矣疾革語家人葬我漢江北城南墓礫與同處魂亦不安志行高潔卽易簣不移也學者稱爲嶧來先生

王朝棟監生義士也嘉慶初身歷戎行累軍績部議以大品

試用棟乞終養辭不就職兄早世撫幼姪如己子飲食教誨
且爲援例入成均姪忘其爲無父之孤也命子貢生王際盛
督修任河路計程一百六十餘里三載工竣心力俱瘁道光
十三年歲大饑捐錢穀助賑又於瓦房店義倉側捐修義學
教鄉子弟知縣徐名元潤嘉之志其事

志載藝文

王德宇郡廩生敦厚簡重行止不苟處衆論喧囂中其言獨
訥訥然不出諸口人以橫逆加受之不校家貧舌耕外一毫
不妄取年近八十祇以讀書爲樂雖瓶無宿食澹如也渾渾
穆穆言行一無所玷士林稱其有古風

唐文德監生居竹黃溪爲人樸誠渾厚遇貧困不吝周恤而

戶族中之窮乏者尤加意提攜人多賴以成立

孝友

陳家麟字會孔監生陳明德次子廩貢生聲榮聲惠之父也賦性果敢膂力兼人嘉慶初練鄉勇禦賊二年五月十六日賊突至蜂集門首舉家不知麟覺急入內室扶其母率家人趨宅後短垣下麟手舉出園牆者十餘人而身負母未及踰垣賊已集母曰勢急矣爾速逃母以我累也麟不肯賊矛刺母背母慟號麟置母於地以身翼蔽奪其矛與賊手格者久之賊來愈衆麟獨身難支身被數十創而死母以麟與賊格伺間匿麻叢中獲免賊去母泣述其狀鄰里爲之感泣

石兆泰秉性端方樸實鄉里咸推重之而居家事親溫柔
順嘉慶初奉祖母避賊適肩輿者逸去母氏蔡語泰曰吾死
於此矣爾速逃泰泣曰母死孫安得獨生遂負之行賊至以
矛擊其額曰負者何人曰祖母曰胡不捨而去曰臨難棄親
心不安也賊歎曰爾心孝吾不忍爾殺速去後來者恐不爾
容遂免於難其父在朝性嚴厲稍拂意鞭笞輒加泰順受無
愠色父患噎病侍湯藥衣不解帶者四十餘日

石萬正湖南人居盤庖河性孝順嘉慶四年賊首龍紹周犯
境擄正父去莫能救是夜正攻賊營賊擒將殺之正屈服釋
焉數日後見父若不相識者然於是居治炊行荷擔意氣殷

勤賊喜甚忽一日向賊指其父曰此老矍鑠可令負重與我同行賊允之夜過石馬寨正率父逃追者數十人正桀石投之連斃二賊賊退攜父入寨得全現年八十八歲鶴髮朱顏孫曾繞膝人以爲孝德之徵

任重謀居權河髫年喪明其父年八十餘窘於步履嘉慶初賊匪逼境舉家潰散謀以得扶持者走避獨遺父不及偕匿謀詢知之欲歸與父同死妻子攬裾阻之謀絕裾而去摸索抵家賊擒獲訊所由來謀泣實告賊憐其孝并其父遣之

李太和邑庠生嘉慶二年賊至舉家奔散母年七十餘患病難行生襁負以逃遇賊賊欲殺母掠生去生泣曰無殺吾母

願以身代賊驚感釋之令速行孝心真摯如此

王維翰蒿坪河民嘉慶二年賊至蒿坪河翰偕父避賊賊擒其父去翰救父情切不暇自顧挺身殺入賊營賊合圍翰又被擒與父俱遇害

賀南松五郎舖民嘉慶五年十二月賊由西坪過黃龍洞松父羽高年八十四被賊獲縛諸門復入搜其財貨時松自外歸見父縛解之挾以奔寨未至賊追之急松號呼曰父速走自以身禦賊築石投之高入寨卽遣人救應松已被重創昇還寨次日斃時年六十七歲

唐有富居廟溝其父早歿母目瞽無媳富事之維謹家貧傭

工爲養每日雞鳴起爲母治炊俟天曙奉膳訖方往工作晌午復歸侍膳及晚亦然母病不能起溺必親身提攜無少疏懈如是者數年母亡乏殯殮資鄉黨感其孝爲助賻焉後以思母不已哭泣失明聞者無不太息

陳希益字德三居箭竹河早失怙母氏李病臥床蓐十二年益侍湯藥晝夜不離側母溺溲益則如抱嬰兒狀事之汚衣躬自盥濯不假手於媳母屢止之不聽曰兒幼時母不畏兒之穢今母病兒獨畏母之穢乎母卒哀毀骨立弟錫茹嘉慶四年被賊擄掠益每念及輒椎心號哭又恐傷母氏心哭必遠避後弟歸友愛愈篤

監生張應爵廩生張應昌之兄也性質樸敦友愛嘉慶元年教匪圍生宅家中遇害者九人弟應昌三齒幾幾賊手爵奪之奔走失足仆積屍中賊持矛亂刺爵以身翼蔽忍死不舍賊退爵昏絕救甦弟以懷抱得無恙

甘其華居廟溝父早故力耕養母先意承志母偶外出華皇皇然如有所失及見母婉容笑語狀如孩提母氏籍崇陽年邁思歸籍一視若家赤貧無資華體母心力積數年得青蚨若干親奉母歸年餘來紫母心甚慰後母卒盡哀數年常如孺子泣行道惻然

龔學禮居遶溪河年二十九歲農力營生嘗往蜀比反距家

尚百餘里日已暮遇同里以母病危告禮淚涔涔下卽行二更後抵高灘水勢甚深呼渡舟人莫應禮竟涉水過雞鳴抵家母果病篤卽夜延醫診視醫曰扁盧無能爲也禮計窘焚香祝神割左股肉煎湯奉母是夜微瘥不數日全愈

楊朝榜居紅椿壩早失怙家貧力農奉養母氏彭克盡孝道母嘗染病二十餘日醫藥罔效榜恐母病不起夜靜泣禱父木主祈陰相割股瀝血和湯進不數日母病痊

郭兆貴居娑漣河郭連方次子道光五年父病至七年病益劇貴祝神祈父病痊割左股以進

張立元農人也事親孝順道光八年母病茹素三載祈神默